

■ COLUMNA

# La «èra Vincenz» – surtut in grond success per la Raiffeisen

DA BERNARD CATHOMAS

**S**co igl era da spetgar dat il rendaint annual da la Raiffeisen svizra anc ina giada la chaschun als novs responsabels da mussar cun il det sin l'antierur CEO Pierin Vincenz. Il medem en bleras gassetas.

**I**n'exceptiun fa il schefredactor da la «Handelszeitung». El renda attent a la summa che la Raiffeisen ha gudagnà durant ils onns da Vincenz da 2000 fin 2015: total nov milliardas francs. Nov milliardas! En la critica fiss perquai «*etwas Zurückhaltung angebracht*», sco el scriva.

**E**n l'èra Vincenz ha la Raiffeisen fatg il passad ina banca regiunala tar ina banca relevanta per il sistem bancar svizzer. Ed ella ha mess buns fundaments per cuntinuar cun success, sco ils resultats dals davos onns cumprovan. Er per 2018 resta in gudogn da 540 milliuns, suenter ch'ils novs responsabels han tratg giu generusamain ina summa da var 200 milliuns per cuvrir las sperditas eventualas ord fatschentas da pli baud. 200 milliuns pers, dasper 9000 milliuns gudogn – resta in avanzament dad 8800 milliuns!

**N**'han autras bancas betg pers tut autras



summas en il medem temp? Da curt ha la UBS survegnì in chastì da record da 4,5 milliardas, suenter ch'ella aveva avant 10 onns quasi fatg naufragi e duvrà sustegn statal. Er la CS e singulas bancas chantunals han pajà gronds imports sco chastì per fatschentas dubiusas. Tut quai n'ha i betg dà tar la Raiffeisen sut Pierin Vincenz. La banca è creschida senza scandals ed ha fatg grondas innovaziuns. Che quellas includan ristgas era cler.

**I**nsumma, quai ch'ins legia en chausa para mintgatant confus e cuntredictoric. L'emprim vegnir fatg valair che la banca haja pers la credibladad tar la clientella. Pauc sut san ins dentant leger che la summa da credits ipotecars saja s'augmentada per set milliardas sin 180 milliardas. Creschida è er la summa incassada per tschains. Per finir scriva la NZZ: «*Nicht nur das operative Geschäft*

*blieb (...) solide, sondern auch die Kapitalsituation*». Tge vul ina banca dapli? La clientella fida a la Raiffeisen. Daco pia ina tala polemica encunter ils anteriurs manaders?

**J**au na sun betg in spezialist da bancas e finanzas. Per mai èsi cler che fatschentas ston vegnir fatgas a moda correcta e che las controllas severas da la Finma, la surveglianza da las bancas, èn necessarias. Quant lunsch che las rinfatschas envers Pierin Vincenz correspundan a la verdad na sai jau betg giuditgar, er betg quant scuidanza, dubis e nauschadads che stattan forsa davos questa campagna.

**F**atg è ch'in'analisi n'ha da curt chattà nagins mussaments per in cumportament illegal. Ch'il cussegl d'administraziun da la Raiffeisen ha dà ord maun las hottas (mastrinas) a ses CEO, quai n'è betg la culpa dal CEO. La ferma personalitad e la cumpetenzza da Pierin Vincenz èn il motiv principal per l'immens progress da la Raiffeisen durant ses temp.

**S**co mintgin auter ha el il dretg da vegnir considerà senza culpa fin che las dretgiras s'expriman. Sia prestaziun resta extraordinaria, en mintga cas.